



Protocol

## Radunanza cumünala dals 15.12.2022

Presidi: Peer-Puorger Victor

Preschaint: 66 votanta e votants

Giasts:

- Gianna Rauch Poo
- Martina Hänzi
- Seraina Felix Gallmann

S-chüsà:

Scrutinaduras: Mario Molinaro e Flurin Nef da Ramosch

Protocol: Oswald Gian Claudio

tractandas	tema	responsabel
1	0110 Legislativa <b>Salüd</b>	
2	0210 Administraziun cumünala <b>Preventiv</b> Quint economic 2023	
3	0210 Administraziun cumünala <b>Preventiv</b> Quint d'investiziuns 2023	
4	9630 Stabels da la facultà da finanzas <b>Facultà finanziaria cumünala</b> Retratta dal conto per ouvras publicas	
5	0110 Legislativa <b>Seguondas abitaziuns</b> Regulaziun in connex culla vendita da bains immobigliars a persunas a l'ester	
6	3500 Cluchers <b>Sunar oura l'on vegl e sunar aint l'on nouv a Silvester e Büman</b> Sunar ils sains dals cluchers a Silvester	
7	8110 Agricultura <b>Meglioraziun Tschlin</b> Elecziun d'ün/a president/a pella Meglioraziun Tschlin	

9101 Impostas ulteriuras

8 **Fixaziun pè d'impostas**  
Pel on 2023

0110 Legislativa

9 **Varia (radunanza cumünala)**

0110 Legislativa

**16 Salüd**

Il capo, Victor Peer, driva la radunanza e dà il bivgnaint a las 66 preschaintas votantas e votants, sco eir als giasts. A quista radunanza sun preschaintas Martina Hänzi, chi'd es incumbenzada culla coordinaziun da turissem, Seraina Felix, la planisadra chi'd es gnüda incumbenzada culla planisaziun da l'ingrondimaint da la chasa da scoula a Strada e la mainascoula Gianna Rauch Poo.

Sco scrutinadurs vegnan elets, cun vusch unanima, Mario Molinaro e Flurin Nef, tuot duos da la fracziun da Ramosch.

0210 Administraziun cumünala

**17 Preventiv**

Quint economic 2023

Il capo repassa il cuntgnü dal quint economic. Las parts chi cumpiglian las lavurs ordinarias cha'l cumün ha d'evader as preschaintan in ün rom ordinari. Ingio chi vegn l'on chi vain però a divergenzas in congual cun ons passats, da il capo spiegaziuns plü detagliadas. Nouv in quist quint es la posiziun in connex cullas entradas dals fits d'aua da l'Ouvra Electrica Cumünaivla ad Ovella (GKI), la quala es gnüda tutta in funcziun d'ürant l'utuon 2022, e prodüa daspö la forz'electricca. Nouv i'l preventiv es, cha pellas bleras gestiuns sun gnüts drivits contos per contagiar lavurs da mantegnimaint in fuorma visibla aint il quint economic. Pertoc da quist adattamaint sun diversas gestiuns e divers provedimaints cumünals. Il quint economic prevezza entradas da frs. 11'727'200.00 incunter sortidas da frs. 11'029'100.00 quai chi lascha resultar ün suravanz d'entradas da frs. 698'100.00.

*Jon Pitschen Janett – commember da la cumischiun sindicatoria*

Jon Pitschen dumonda, our da che motiv cha l'acquist da maschinas e veiculs vegn per part contagiada sur il quint economic e na sur il quint d'investiziuns.

*Capo*

Il capo spiega chi'd es per part pussibel da decider quai tenor la situaziun. Per nu chaschunar amortisaziuns sur plüs ons, s'haja in divers cas decis da contagiar sur il quint economic uschè cha talas investiziuns sun amortisadas cumplettaing fingià quel on chi sun gnüdas fattas.

Decisiun

La radunanza approvescha il quint economic cun vusch unanima.

0210 Administraziun cumünala

**18 Preventiv**

Quint d'investiziuns 2023

Quai chi riguarda la preschantaziun dal preventiv dal quint d'investiziuns, surdà il capo il pled al manader tecnic.

Il manader tecnic repassa il preventiv dal quint d'investiziuns e da spiegaziuns in connex culs cuosts pels progets chi sun previs da cuntinuar obain realisar d'ürant l'on da gestiun 2023. Büdschetadas sun sortidas da frs. 5'421'000.00 incunter entradas da frs. 586'800.00, quai chi lascha resultar ün suravanz da sortidas da frs. 4'834'200.00. Üna gronda part da quellas sortidas chaschuna il fabricat da l'ingrondimaint, respectivamaing nouv edifizis pella scoula a Strada. Il manader tecnic preschainta als preschaints il proget e spordscha üna invista ils plans da construcziun. El spiega la via inchaminada ed ingrazcha a tuots quels chi s'han ingaschats per quist intent.

Pels seguaints progets vegnan dimena suottamissas a la radunanza dumondas da credits:

- sanaziun piazza da sport Strada (progettaziun)	frs.	50'000.00
- chasa da scoula Strada, ingrondimaint	frs.	4'100'000.00
- chasa da scoula Ramosch, abitaziuns	frs.	50'000.00
- maschina da far loipa	frs.	320'000.00
- sanaziun via cumünala Poz-Avant Porta	frs.	80'000.00
- piazza da parcar Quadra Secha	frs.	77'000.00
- fermada da la posta Ramosch	frs.	13'000.00
- fermada da la posta Strada	frs.	13'000.00
- batschigl da ramassamaint Val Gronda	frs.	70'000.00
- vasca per stüder fö Jürada	frs.	290'000.00
- halla forestala Ischla, deposit da laina	frs.	48'000.00

Davo cha'l manader tecnic ha conclüs sias explicaziuns spordscha il capo amo üna vista i'l passà e da ün sguard i'l avegnir. In quist connex manzuna el progets plü gronds e da quels cun grond'importanza pel cumün.

### Decisiun

La radunanza approvescha il quint economic cun vusch unanima.

9630 Stabels da la facultà da finanzas

### **19 Facultà finanziaria cumünala**

Retratta dal conto per ouvras publicas

In connex culla realisaziun da las lavurs da sanaziun da la via da Seraplana, ha la suprastanza decis da vulair trar a nüz l'ocasiun per evader lavurs necessarias in cumün, sco eir da realisar ün attach d'aua per ün intent da fabrica chi'd es previs da realisar sün terrain agricul suot la fracziun. A listess mumaint vegn adattada la furniziun d'aua da baiver per üna part dal cumün. Pella realisaziun dal proget ha la suprastanza deliberà la proposta da retrar frs. 113'000.00 dal conto da deposit per ouvras publicas.

### Decisiun

La radunanza approvescha la retratta cun vusch unanima.

0110 Legislativa

### **20 Seguondas abitaziuns**

Regulaziun in connex culla vendita da bains immobigliars a persunas a l'ester

Il capo spiega cha in basa a la ledscha introductiva da la ledscha federala dals 16 da december 1983 davart l'acquist da bains immobigliars tras persunas a l'ester es il cumün oblià da comunicar al inspectorat dal cudesch fundiari la decisiun in connex culla quota cha la radunanza fixescha. La suprastanza suottametta in quist connex la proposta da nu limitar la pussibilità, e da restar sco fin da qua pro 100%.

### Decisiun

La radunanza va d'accord culla proposta ed approvescha quella cun vusch unanima.

3500 Cluchers

### **21 Sunar oura l'on vegl e sunar aint l'on nouv a Silvester e Büman**

Sunar ils sains dals cluchers a Silvester

Il capo orientescha, cha a chaschun da la radunanza cumünala dals 31 da marz 2022, vaiva Otto Barblan giavüschà cha la tematica quai chi riguarda il sunar ils sains a Silvester e Büman vegn ponderada danövmaing. Andit a quista proposta ha dat il scumond da sunar ils sains a man cun suas per sunar oura l'on vegl a sunar aint l'on nouv. Quel scumond es gnü ponderà da nouv in suprastanza ed a la fin gnü decis

da laschar sunar ils sains a Strada e Vnà. La suprastanza ha trattà quista chosa a chaschun da sia sezzüda dals 25 d'avrigl 2022 ed es gnüda a la conclusiun da nu far üna cuntraproposta. La suprastanza suottametta in seguit a la radunanza da decider in chosa, voul dir da decider schi's voul surtour la proposta dad Otto Barblan e da scumandar il sunar a man ils sains a Silvester/Büman.

#### *Otto Barblan*

Otto manzuna ch'el es da l'avis chi'd es correct da laschar sunar ils sains electronicamaing e da scumandar da far quai cun suas. Il privel da dons e dad accidaints es massa grond. Tenor el nun es quai correct cha la generalità segna a la fin dals quint respunsabla, in cas da dons ed accidaints.

El fa dimena la proposta da laschar sunar ils sains sco manzunà da las installaziuns electronicas.

#### *Armon Mayer*

Ad Armon para quai curius, cha la suprastanza suottametta a la radunanza üna fatschenda chi suottastà a las cumpetenzas da la suprastanza. Propostas da votantas e votants, inoltradas a chaschun d'üna radunanza, dessian gnir suottamissas al organ toccant, il qual dess decider. El es eir da l'avis chi nun es correct cha la suprastanza nu fa ingüna proposta in quist connex. Cha davart da las instanzas cumünalas as voul excluder da surtour la respunsabilità ed eir eventuels cuosts til para curius.

El fa la cuntraproposta, dimena da laschar sunar ils sains a man cun suas.

#### *Peder Caviezel*

Peder as fa pissers quai chi riguarda la chüra cha la generalità ha invers ils bains culturals. Tenor seis parair es da chürar la cultura locala per cha quella possa gnir datta inavant a las proschas generaziuns. Il cumün ha fingià pers numerusas societats dal chomp da cultura, ün svilup chi'd es da frenar. Il sunar ils sains a man es ün'üsanza chi exista fingià decennis scha na daplü sco ün tschientiner. Our da quel motiv esa in seis ögls sbaglià d'argumantar cun privels e dons. La radunanza ha be güsta approvà sortidas da passa frs. 5.1 milliuns, uschè chi's sarà eir bun da pajar eventuels pitschens dons vi da las installaziuns. Peder sustegna la proposta dad Armon Mayer, dunque da laschar sunar ils sains eir in avegnir a man.

#### *Marianne Caviezel*

Marianne manzuna ch'ella es gnüda d'utrò a star a Valsot. L'üsanza da sunar ils sains a Silvester/Büman es ella uschè gnüda a cugnuescher pür sco duonna creschüda in Engiadina. In seis ögls es quist ün'üsanza fich bella e cun character unic in Svizra. Visitas ch'ella retschaiva sur festas ha fintant spostà lur termin da Nadal sün Silvester, e quai be per pudair tour part a la tradiziun da sunar ils sains a man. Ella metta in dumonda, scha quai saja correct cha la respunsabilità vegn surdatta ad üna persuna, per cha'l cumün nun ha da surtour cuosts da dons e da portar la respunsabilità per accidaints. In mincha cas as pudess render attent pro l'entrada dals cluchers in plüssas linguas als privels e cha'l cumün nu surpiglia la respunsabilità in cas chi's va sül clucher.

Ella sustegna l'idea dad Armon Mayer, dunque da laschar sunar ils sains eir in avegnir a man.

#### *Capo*

Il capo manzuna ch'el saja gnü contactà dad üna persuna chi nu sta in cumün. Quella persuna ha tut spraisa per quels chi vöglian sunar ils sains cun suas e cha quai gajan a perder üsanzas cun similis scumonds.

Tenor il capo sun simlas üsanzas in prüma lingia qua pella glied indigena. El nun es da l'avis chi'd es da mantgnair simlas üsanzas pels esters.

#### *Dumenic Häfner*

Tenor seis savair, sun las installaziuns dals sains dal clucher a Strada gnüdas fattas da maniera chi'd es pussibel da tils sunar obain sur il sistem electronic sco eir a man cun suas. El es inavant eir da l'avis chi nun es pussibel da surdar ad inchün la respunsabilità. Respunsabel es e resta il possessur dal edifizii. El deplorescha situaziuns sco chi sun statta a Ramosch. La es gnü ruot aint il clucher ed in seguit sun ils sains gnüts muantats cullas chommas per chi sunan. El sustegna l'idea da laschar sunar ils sains a man a Silvester/Büman, e sustegna uschè la proposta dad Armon Mayer.

#### Decisiun

Il capo suottametta a la radunanza las propostas dad Otto Barblan; laschar sunar automaticamaing ils sains, ed Armon Mayer; laschar sunar a Silvester/Büman ils sains cun suas.

La radunanza decida cun 39 cunter 14 vusch pella proposta dad Armon Mayer. Uschè cha a Ramosch ed a Vnà dess gnir pussibilità darcheu da sunar ils sains a man cun suas. Il capo manzuna cha davart dal cumün vegnan fats sclerimaints quai chi riguarda la respunsabilità.

8110 Agricultura

## 22 Meglioraziun Tschlin

Eleczin d'ün/a president/a pella Meglioraziun Tschlin

Il capo orientescha, cha ad incuort ha inoltrà il president da la Meglioraziun Tschlin, Georg Häfner, sia demischiun sco president. El argumantescha quella cul fat, ch'el saja occupà fich ferm cun otras incumbenzas e vess gugent da's concentrar plü ferm sün quai. Georg ha fat d'ürant blers ons las lavurs pella meglioraziun per quai cha'l capo til ingrazcha fich. Sco nouv president propuona la suprastanza a Bastian Janett. Bastian Janett es ingaschè pro la ditte forestala da lur famiglia ed as rechatta immez la scolaziun da silvicultur, la quala po gnir absoluta in fuorma complementara a la professiun.

### Decisiun:

La radunanza elegia a Bastian Janett, cun vusch unanima, sco nouv president da la Meglioraziun Tschlin. Il capo til ingrazcha per sia prontezza es seis ingaschamaint futur a favur da la chosa.

9101 Impostas ulteriuras

## 23 Fixaziun pè d'impostas

Pel on 2023

La suprastanza propuona da laschar il pè d'impostas pel on 2023 sco fin da qua, dimena sün 95% da l'imposta chantunala simpla. I nu vegnan fattas ingünas cuntrapostas.

### Decisiun

La radunanza va daperüna cun quai ed aderischa a la proposta cun vusch unanima.

0110 Legislativa

## 24 Varia (radunanza cumünala)

### *Daniel Cotti – offrir per lavurs publicas*

Daniel Cotti dumonda, scha quai ha ün scopo cha affars in cumün nu tschüffan la pussibilità d'offrir per lavurs publicas. Persunalmaing ha el ün affar chi fa lavurs d'art, sco eir üna falegnamaria. El nu vegn però circa mai invidà per offrir obain dumandà per ün'offerta. El manzuna ch'eir oters affars han manzunà quel problem.

### *Capo*

Il capo manzuna chi nu detta ingün motiv concret per quai, e cha tenor seis savair vegnan resguardats adüna darcheu tuot ils affarist in cumün in connex cun lavurs. El manzuna in quist connex però chi da suvent la situaziun cha'l cumün invida per offrir ed a la fin nu aintran da diversas dittas ingünas offertas. A Daniel disch el ch'el dess gnir invers il cumün, sch'el ha il sentimaint da nu gnir resguardà avuonda.

### *Manader tecnic*

Il manader tecnic manzuna cha lavurs vegnan per part surdatta in pakets insembel cun lavurs dad oters geners, e la nun exista adüna la pussibilità d'invidar a tuots. Sur tuot las lavurs oura però vegn resguardada tuot la mansteranza in cumün.

### *Duri Caviezel*

Duri spiega ch'el es daspö 7 ons in cumün e paja in seguit privat sco eir pella ditte impostas. El nun pudü offrir per bleras lavurs cha'l cumün ha surdat d'ürant quels 7 ons. Per part vess el gnü la pussibilità da far üna ARGE per surtour da quellas lavurs. Per quellas lavurs ch'el ha offri ha el svesch dumandà prol cumün pellas actas. Concretamaing ha el pudü offrir dal 2022 per ün'unica incumbenza. El es dischillus da quai.

*Manader tecnic*

Il manader tecnic manzuna ch'in connex culla surdatta da las lavurs pel edifizii da la butia a Ramosch sun gnüts fats pakets tanter divers mansterans. Quai simplifichescha la coordinaziun da las lavurs e da la fabrica.

*Otto Barblan – Spias portal Ramosch*

Otto Barblan manzuna il proget da las spias pro l'entrada dal cumün da Valsot, fracziun Ramosch, a l'ur da la via chantunala. Quellas spias han chaschunà ün bel rebomb. Our da quel scopo til para ridicul, cha las tablas da trafic sgradan il purtret, schi's vegn nan da la Punt Peidra. Our da quel motiv propuona el da contactar l'uffizi da construcziun bassa chantunale e d'examinar schi nu füss pussibel d'adattar al situaziun da maniera cha las tablas nu sgradan plü il purtret dal lö.

*Capo*

Il capo ingrazcha ad Otto per sia observaziun. Il cumün sclerischa che per pussibilitats chi stan a disposiziun.

*Dumenic Häfner*

Dumenic renda attent a la publicaziun sül Mas-chalch quai chi riguarda la s-charsdà da forz'electric. In quist connex til para fich curius cha la populaziun vegn rendüda attenta da nu sguazzar energia, ed a listess mumaint prodüa il cumün naiv artificiala pella loipa da passlung. Tenor el pudess il cumün ir ouravant cun bun exaimpel es cumportar uschè co chi's spetta dal privat. Las remarchas da Dumenic Häfner vegnan tuttas incunter sainza gnir commentadas dal capo.

7556 Ramosch, 23.12.2022



capo:

manader administraziun: